

**REGIONAL NEWS BULLETIN
HEADLINES (EVENING)**

Date – 15/12/2024

Time - 18:30 Hrs

1. CADC-a MDC ngah ber ni ta ZPM MDC 10-te chuan sorkarna siam tumin naktuk hian larsap Dr.Hari Babu Kambhampati hmuh an tum.
2. International Paragliding Accuracy Championship leh Air Sports Festival 2024 chu Serchhip Zawlpui-ah Chief Minister Pu Lalduhoma'n a khar ta.
3. Kumin thla 11 chhung khan Mizoramah Dengue hri vei mi 719 hmuhchhuah a ni a, an zinga 1 a thi.
4. Lok Sabha leh state assembly inthlan, a ruala buatsaihna tur, One Nation One Election kaihnhawih bill 2, naktuk Lok Sabha inkhawmah put luh a ni dawn.

<><><>

CADC

Chakma Autonomous District Council (CADC)-a MDC ngah ber ni ta ZPM MDC 10-te chuan CADC-a sorkarna siam thei an nih thu hriattir turin naktuk hian larsap Dr.Hari Babu Kambhampati hmuh an tum.

ZPM General Headquarters President Pu Lalliansawta chuan nimin khan ZPM pisa-ah an party zawm thar CADC MDC 5-te lawmluhna hun an hmang tih swiin,heti hian CADC-ah ZPM Party chuan MDC 5 a neih sa tawhte leh tuna MNF MDC 5, ZPM zawm tharte nen MDC 10 a nei ta a, CADC-ah MDC ngah ber party a ni ta a ni, a ti a. Kalphung thar, mipui sorkar chuan autonomous ditriect council-a party dang sorkar lai thiah tumin sorkar chakna nen hmalakna a nei ngai lo niin a sawi a. Chutih lain anmahni duhthu ngei a ZPM rawn zawmte erawh chu ZPM Party chuan lawm takin a lo pawm thung a ni a ti. CADC-ah hian MDC 20 awmin MNF MDC 5 in anmahni duhthu ngeia ZPM Party an zawm tak avangin ZPM Party chuan MDC 10 a nei ta tih sawiin, BJP in MDC 9 an nei a, MNF in MDC 1 an nei ta a ni a ti a. Tunah hian ZPM Party chu CADC-ah MDC ngah ber party a lo nih tak avangin CADC-ah sorkarna siam tumin MDC 10 te chuan Thawhtanni-ah larsap hmuh an tum a ni, a ti.

He hunah hian Local Administration, District Council & Minority Affairs changtu minister Pu Lalsawivunga pawhin thu sawiin, CADC –a MDC 5 in an mahni duhthlanna ngeia ZPM Party an rawn zawm chu lawmawm a tih thu leh, Mizoram tan mai bakah CADC mipuite tan hmasawna tluantling thlentun ni turin duhsakna a hlan ani. MDC 5 te lawmluhna ah hian ZPM General headquarters hruaitute bakah MLA thenkhatte an tel baw k a ni.

<><><>

PARAGLIDING

International Paragliding Accuracy Championship leh Air Sports Festival 2024 chu nimin chawhnu khan Serchhip Zawlpui-ah Chief Minister Pu Lalduhoma'n a khar.

Pu Lalduhoma chuan infiammite tumruhna leh inpekna a fak a. Ram dangte nena inpawhna leh inthianthatna siamna kawnga he hun pawimawhzia sawiin, Mizoram chu adventure tourism hmunpui a nih theih dan a tarlang baw k. Serchhip khawpui boruak muanawm, mawi leh hmuhnawm takah paragliding atana hmun tha tak a awm chu lawmawm a tih thu a sawi a. Helai hmun hi India rama adventure sports atana hmun tha ber pawl a nih avangin Adventure Tourism hmasawna atana hmun pawimawh tak a ni, a ti. Tualchhung Mizo pilot-te thawhrimna chu lawmawm a tih thu leh a chhuan thu sawiin pilote te inpekna leh thiamna te bakah Mizoram Sawrkar, MASA, FAI leh Serchhip mipuite thawhhona tha tak avangin he Championship hi a hlawhtling a ni, a ti baw k.

Tourism Minister Pi Lalrinpuii pawhin International Paragliding Accuracy Championship hlawhtlinna tura thawktu zawng zawng chungah lawmthu a sawi a. Ram dang atanga lo kalte pawh championship chu anmahni vanga hlawhtling a ni a, an rama an haw leh hunah pawh Mizoram hre reng turin a chah a ni.

He championship-ah hian ram paruk—India, Korea, Kazakhstan, Spain, Indonesia leh Nepal atangin infiammi mi 30 an tel a. Mipa inelna-ah Aman Thapa (Nepal) chu pakhatna niin Yuda Mesa Putra (Indonesia) leh Akshay Kumar (India) chu pahnihna leh pathumna an ni a. Hmeichhe intihsiakna-ah Eun Young Cho (Korea) chu pakhatna niin Disha Fajar Praharini (Indonesia) chu pahnihna a ni a, Alisha Alisha (India) chu pathumna a ni. Team Category ah Indo David Team, Indonesia leh Spain

inkawp an champion a. Hei bakah hian national category mipa leh hmeichhia a awm bawk. Category tinah hian pakhatnain cheng nuai hnih pahnihna in cheng nuai khat sing nga leh pathumnain cheng nuai khat an dawng a ni.

<><><>

AIZAWL TRAFFIC

Hunpui lo thleng turah Aizawl Traffic police te chuan ngawrh takin khawpui chhung-ah duty insiamin lirthei vakvelte lakah khauh lehzualin mipui himna atan hna an thawk mek.

Aizawl Traffic SP Pu Stephen Lalrinawma chuan zan lamah dar 12 thleng duty a an chhuah thin thu leh mipui an lo him zawk na'n zing lamah pawh maxi-cab, bus leh taxi chhuak tur driver te chu zu in chung a lirthei an khalh mai mai loh nan lirthei leh a khalhtute endik hna kalpui a nih tur thu a sawi a. Mipui leh lirthei chhuak a tam tawh dawn avangin traffic tawt tihzia-awm na'n lirthei kalna siksawi danglam a tulna lai a awm thei tih sawiin, siam danglam a nih pawhin mipui te'n hrethiam turin a ngen a. Tawhsual leh vanduaina thleng a awm loh nan mipui pawh kawng kanna tura siam-ah chauh kawng kan turin a ngen a ni.

Traffic SP chuan kumin hunpui Krismas leh kum thar lo thleng tur inbuatsaihna kawngah traffic dan te zawmin, rui chung leh dan zawm lo-a lirthei khalh chu chetsualna thlen thei leh mahni fimkhur loh avanga midangte'n chhiatna an tawh phah theih avangin traffic dan leh hrai te zawm hram hram turin lirthei khalhtute a ngen a ni.

<><><>

CHRISTMAS CAROL

Larsap Dr. Hari Babu Kambhampati leh a nupui Pi Jayasree Kambhampati te hovin nizan khan Raj Bhavan-ah Christmas Carol neih a ni a, he hunah hian Aizawl West-I Area Masihi Sangati, Mizoram Presbyterian Church member 32-te an tel a ni. Larsap te nupa chuan Mizoram mipuite Krismas leh Kumthar hun hlimawm tak hmang turin duhsakna an hlan a. Larsap chuan Krismas lo thleng tur chuan remna leh muanna bakah inpumkhatna thlen se a duh thu a sawi bawk.

<><><>

CHAMPHAI CHRISTMAS

Champhai District ah Krismas 2024 leh Kumthar 2025 lo thleng tur atana inbuatsaihna a vawrtawp a thleng chho mek.

Khaw hrang hrangte'n Champhai Bazar-ah chakkhai a lam nasa-in lirthei leh mihring, khawlaiah an thahnem tawh hle a, Dawrkai tam tak chuan kumin hian sum lengvak a la tlem rih niin an sawi. Mizoram Sawrkarin Faina kawngah hma la tura Village Council tinte a hrilh tihpuitlin na'n kumin hian Faina kawngah VC, YMA leh MHIP ten an mahni huamchhung theuh ah hma an la nasa a, nimin khan Champhai Kahrawt Veng MHIP Branch chuan an kumpuan, Faina Kum kharna hun hmangin hnatlang hnuhnung an ko a, hnatlang kalkim Pi Rohmingthangi, Kum 90 mi hnenah lawmman an hlan a, kumin hian thla hnih danah hnatlang an ko ziah a ni.

Tun thleng hian Champhai veng khawi hmunah mah kawng leh Kawthler chei an la awm lova, mimal In leh Pathian Biak In cheimawi erawh an awm nual tawh ani.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te, chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

DENGUE

Kumin thla 11 (January atanga November thla inkar) chhung khan Mizoramah Dengue hri vei mi 719 hmuhchhuah a ni a, an zinga mi 1 a thi.

Health & Family Welfare department hnuai a State Vector Borne Disease Control Programme (SVBDPCP) hotute sawi danin kumin thla 11 kalta chhung khan Dengue natna kai ni a inringhlel mi 8,562 thisen endik a ni . an zinga mi 719 in he natna hi an vei tih hmuhchhuah a ni a. Hri kai hmuhchhuah zinga 503 te chu Aizawl district ami an ni a, Lunglei district-ah Dengue hri kai mi 176 leh Champhai district-ah mi 14 hmuhchhuah an ni bawk. Dengue natna hi Mizoramah kum 2012 khan hmuhchhuah tan a ni a, hemi kum hian mi 6 hmuhchhuah an ni a. Kumtin hmuhchhuah pungchho zelin, kum 2020 leh 2021 a Covid-19 hri len lai khan tlem chho mah se kum 2022 khan mi 1,868-in he hri hi kai-in mi 5-in an thihpui ani. Nikum kha Dengue hri kan an tam ber a

ni a, mi 12,949 thisen endik zinga mi 2,060-in kai-in mi 2-in an thih phah a, kumina mi nen Mizorama Dengue vanga thi zat hi an vaiin 8 an tling tawh a ni.

Dengue natna hi thosi chi khat Aedes-in a put darh a ni a, hetiang thosi hian chhunah mi a seh thin bakah Mizorama a tam avangin fimkhur turin health department chuan mipui a chah a ni.

<><><>

ONE NATION ONE ELECTION BILLS

Ram pum huapa Lok Sabha leh State assembly inthlanpui, a ruala buatsaihna tur, One Nation One Election kaihnawih bill 2, naktuk Lok Sabha inkhawmah put luh a ni dawn a, Union Law Minister, Arjun Ram Meghwal-a'n The Constitution (129th Amendment) Bill leh The Union Territories Laws (Amendment) Bill-te hi a pu lut ang.

Lok Sabha leh state assembly inthlan, a ruala neihna tur, constitutional amendment bill hi Ningani kaltaa Prime Minister Narendra Modi-a hova Union Cabinet thutkhawmnaah pawm a ni.

<><><>